



Ի սոցն Երկրորդ Հատորին՝ առաջի կայ մեզ պատմել զանցս իբր 130 ամաց , յորս անընդհատ երեւին յաջորդութիւնք Պատրիարքաց Ս. Աթողոյն ըստ կարգին , զանազան արկածք ժամանակին . սակաւ ուրեք , յորս փայլի Վանք Ս. Յակոբայ պաշտօնութեամբ , և հանգիստ ՚ի խոր խաղաղութեան , Առաջնորդութեամբ խոհեմ և արթուն հովուաց : Եւ է զի՝ բազում անգամ պատահեալ ձախող ելից եւ անյաջող դիպուածոց , եւ վերստին անկեալ ՚ի վտանգս՝ հեծէ դառնագին ՚ի ներքոյ տառապանաց . և այս յաւէտ ՚ի դառնութեան և ՚ի խիստ հարկապահանջութեան ժամանակս , ՚ի նենգամիտ ատելութենէ և յոխերիմ թշնամութենէ օտարաց . եւ երբեմն եւս շահագէտ ընտանի դարանակալաց , զորս ունինք պատմել ըստ կարգի ՚ի գիրս յայս : Սակայն ՚ի սոյն միջոցիս՝ երբեմն առատութեամբ ճոխանան նիւթք , և է զի՝ նուազեալ խաղառ դադարին . այլ որքան հասին ՚ի ձեռս մեր հատակոտոր թուղթք , նամականիք , կոնդակք և գատաստանական թղթեանք , յորոց քաղեալ եղաք ՚ի կարգի Պատմութեանս՝ խորշելով միանգամայն յաւելորդ և յերկար բանից :

